

Դանդաղ մահ

Դանդաղ մահ

հեղինակ՝ Էրսկին Քոլդուել
թարգմանիչ՝ Ա. Փանոսյան
աղբյուր՝ «XXրդ դարի արտասահմանյան արձակ» (1 հատոր)

Հազիվ թե կարիք կա նշելու,
որ այս պատմվածքը գրվել է 1932 թվականին:

Ամբողջ օրը մենք նստած էինք եղել դաշնամուրի արկղի մեջ՝ սպասելով անձրևի դադարելուն: Ներքևում՝ քսան քայլ այն կողմ, հոսում էր պղտոր Սավանան, դեպի ծով տանելով սոճու չորացած կոները և գառիթափի ծառերի փտած մնացորդները: Հինգերորդ փողոցի վերջերս կառուցված կամուրջը վերևից մեզ պաշտպանում էր անձրևից: Արկղի անկյունների տակ աղյուսի կտորներ էինք դրել՝ հատակը չոր պահելու համար, և կամրջից ու կարմրակավ ասփից առհոսող ջուրը գնում էր դեպի վարարուն գետը: Ժամանակ առ ժամանակ Դեյվը, չորեքթաթ, շտկում էր ծղոտը: Բանանի ծղոտ էր՝ խոնավ, գարշահոտ: Երկուսով հազիվ էինք տեղավորվել արկղի մեջ, և եթե ծղոտը հարթ չէր փռվում, քարե կոշտերի պես անհանգստացնում էր:

Մեր կողքին՝ չոր, հարմարավետ արկղերում, չորս հոգուց բաղկացած մի ընտանիք էր ապրում: Արկղերը միացված էին կողքերից բացված անցքերով՝ շան բների նման, և ստացվել էին չորս-հինգ սենյակներ: Կինը երկու հավ ուներ, որոնց գիշեր-ցերեկ պահում էր իր մոտ՝ արկղում և շոյում փետուրները, ասես, համոզելով ձու ածել: Կամրջի տակ՝ Հարավային Կարոլինա մասում, տասնյակից ավելի ուրիշ արկղեր կային. երբ սովահար ու դավկադեմ ծեր տղամարդիկ կամ կանայք մեռնում էին դրանցից մեկում, նրանց դիակները տանում էին ներքև՝ գետի մոտ և հանձնում պղտոր ջրերին. երբ երեխաներ էին ծնվում, մարդիկ հենվում էին ճաղերին, ականջ դնում երկունքի ճիչերին և գետնընկույզի կնճեպներ շաղ տալիս շուրջ բոլորը:

Մայրամուտին անձրևը հանդարտվեց: Թվում էր, մինչև առավոտ երկինքը չի պարզվելու, և մենք համոզված էինք, որ ամբողջ գիշեր մաղելու է: Դեյվը անհանգիստ էր և այլևս չէր կարող մնալ արկղում:

— Գնանք, Մա՛յք,— ասաց նա:— Դուրս գանք այստեղից և ուտելու որևէ բան գտնենք:

Նրա ետևից գառիթափի կարմիր ցեխի միջով բարձրացա դեպի սալահատակ փողոցը: Քայլում էինք ջրափոսերի միջով՝ ընթացքում մաքրելով մեր կոշիկների կարմիր, կաշուն կավը:

Դեյվը գրպանում հիսուն սենթ ուներ, բայց ես որոշել էի նրան թույլ չտալ ինձ համար ուտելու որևէ բան գնել: Տարբեր ընդմիջումներով նա երկու շաբաթ թղթազամբյուրներ էր փաթեթավորել մի նկուղային ֆաբրիկայում, և երբ աշխատանք էր եղել, օրեկան հիսուն

սենթ էր վաստակել: Նախորդ օրը նա աշխատել էր նկուղում, և ամբողջ այդ ժամանակ փողը մնացել էր նրա մոտ:

Երբ Ջորջիայի ուղղությամբ անցանք գետը, ես կտրուկ շրջվեցի և սկսեցի փախչել: Հիսուն յարդ հագիվ էի անցել, երբ նա բռնեց բանկոնիցս: Հետո ձեռքը հանեց գրպանից և ցույց տվեց հիսուն սենթանոց մետաղադրամը:— Ինձ համար մի անհանգստացիր, Դեյվ,— ասացի ես՝ բռնելով նրա դաստակը և ձեռքը նորից դեպի գրպանը տանելով:— Մինչև վաղը մի բան կանեմ: Ինձ կես օրվա աշխատանք են խոստացել, որը, համենայն դեպս, մեկ կամ կես դոլար պետք է որ բերի: Գնա և կարգին սնվիր, Դեյվ:

— Ո՛հ,— ասաց Դեյվը, արագորեն ձեռքը հանելով շավարի գրպանից:— Մենք սա միասին պիտի ծախսենք:

Նա ինձ իր հետ քարշ տվեց քաղաքի ուղղությամբ: Մենք անցանք կանաչների միջով և հողաթմբով իջանք սալարկուղի: Թույլ նարնջագույն կարմրություն կար ցածր երկնքում, իսկ փողոցներում իր կենսապայմանների համար մարտնչող մոլեգնած ամբոխի նման աղմկում էին մեքենաները:

Միասին քայլեցինք քաղաքի ուղղությամբ՝ չրմփացնելով անձրևից գոյացած ծանծաղ ջրափոսերում: Հանկարծ Դեյվը կանգնեց մի մեծ ջրափոսի ճիշտ կենտրոնում, որի ջուրը դեռ չէր հասցրել հոսել դեպի առուները:— Դու ջահել ես, Մայք,— ասաց նա՝ բռնելով բանկոնիցս և քաշքշելով, ինչպես շունը կքաշքշեր բարձր:— Ես ծեր եմ, բայց դու ջահել ես: Դու կարող ես գտնել ելքը, վերադառնալ ու ասել ինձ, և մենք գործի կանցնենք:

— Ի՞նչ է պատահել, Դեյվ,— հարցրեցի նրան:— Ինչի՞ մասին ես խոսում:

Ձեռքերի շարժումով նա մի աղեղ գծեց՝ նկատի ունենալով աշխարհը:— Աշխարհում մարդիկ կան, որոնք գիտեն, թե ինչ պետք է անել այս վիճակից դուրս գալու համար: Եթե կարողանայիր գտնել նրանցից մեկին և վերադառնայիր, մենք գործի կանցնեինք:

— Երկուսով ոչինչ անել չենք կարող, Դեյվ: Նախ՝ մենք պետք է շատ կողմնակիցներ ունենանք:

— Դրա համար մի՛ անհանգստացիր,— ասաց նա:— Հենց որ մարդիկ իմանան, թե ինչ և ինչպես պետք է անել, մենք կարող ենք ոտքի ելնել և գրողի ծոցը ուղարկել այդ ճարպակալած բներին, որոնք մեզ աշխատանք չեն տալիս:

— Գուցե դեռ ժամանակը չէ, Դեյվ:

— Դեռ ժամանակը չէ: Մի՞թե արդեն երկու տարի ես գործազուրկ չեմ: Հիմա է ժամանակը, երբ բոլորս սովամահ ենք լինում և գնում դեպի գետի կաշուն ճահիճը:

Մինչ ես որևէ բան կասեի, նա շրջվեց և կրկին սկսեց քայլել փողոցն ի վեր: Վազեցի և հասա նրան: Մենք չրմփացնում էինք ջրափոսերի մեջ՝ շրջանցելով նրանք, որ ավելի խորն էին երևում:

Երկու տարի առաջ Հարավային Օգոսթայի պարարտանյութերի գործարաններից մեկում Դեյվը հարմար աշխատանք էր ունեցել: Բայց մի օր նրան ընդմիջտ դուրս էին նետել: Նույն այդ ժամանակ ազատել էին ևս յոթանասուն հոգու: Դեյվն ինձ երբևէ չէր ասել, թե հետագայում ինչ էր պատահել նրանց, բայց թե ինչ էր պատահել Դեյվին, ես գիտեի: Այն բանից հետո, երբ նա տան վարձը վեց-յոթ ամիս ուշացրել էր, տանտերը պահանջել էր ազատել սենյակը: Դեյվը չէր համաձայնել: Ասել էր, որ պատրաստվում է մնալ այնքան, մինչև որ պարարտանյութերի գործարանում կընդունեն իր նախկին աշխատանքին: Եվ մնացել էր:

Մնացել էր ևս չորս ամիս, բայց մինչ այդ տանտերը հանել, տարել էր պատուհանների փեղկերը և դռները: Ձմռանը անձրևները հեղեղել էին տունը, և այն տամկացել էր փտած ծառի պես: Հետո հունվարյան սառնաշունչ քամիներն էին ներխուժել բազմաթիվ ճեղքերից՝ ատամները սեղմած խելագարի պես սուլելով: Վառարանի համար փայտ ու քարածուխ չէր գտնվել: Դեյվի, նրա կնոջ ու երեք երեխաների ունեցվածքը եղել էին երկու մզդակած և մեկ բրդե վերմակները: Երեխաներից երկուսը մահացել էին նախքան հունվարի ավարտը: Փետրվարին թաղել էր կնոջը: Մարտին եկեղեցիներից մեկում հատուկ հանգանակություն էր անցկացվել Դեյվի և նրա տասնմեկամյա դստեր համար, բայց Դեյվն ասում էր, որ այդ հանգանակությունից իրեն ընդամենը խակի գույնի մի շավար է բաժին հասել՝ նստատեղին ափսեի մեծությամբ անցքերով:

Դեյվը չգիտեր, մահացել է իր լքված աղջիկը, խնամակալությամբ է վերցվել բարեգործական ընկերությունների կողմից, թե՛ հասարակաց տուն է մտել: Վերջին անգամ նրան տեսել էր այն առավոտ, երբ ոստիկանը եկել ու տարել էր աղջկան՝ Դեյվին թողնելով նստած անպատուհան տան անկյունում՝ բրդե վերմակներով փաթաթված:

Մենք արդեն հասել էինք Յոթերորդ փողոցի անկյունը: Հրապարակը կորել էր մշուշում, իսկ շուրջ բոլորը հարյուրամյա դամբանաքարերի խոնավ գորշությամբ հառնում էին բարձրահարկ հյուրանոցներն ու կառավարական շենքերը:

— Գնա մի բան կեր, Դեյվ,— նորից ասացի նրան:— Ես քեզ այստեղ կսպասեմ, և մենք կվերադառնանք գետափ, որպեսզի ցրտին դրսում չմնանք:

— Առանց քեզ մի քայլ անգամ չեմ անի:

— Բայց ես քաղցած չեմ, Դեյվ: Ճիշտ եմ ասում: Ես քաղցած չեմ:

— Ուրեմն ես էլ չեմ գնում,— նորից ասաց նա:

Սովորականից ավելի ցուրտ ու խոնավ գիշեր էր: Առվակների մեջ ջուրը սողում էր օձի պես, և թվում էր, ուր որ է կսառչի: Քամի բարձրացավ՝ մշուշը քշելով դեպի գետը և դաղելով մեր մեջքը:

— Շտապիր, Դեյվ,— խնդրեցի նրան:— Անտեղի սառչում ենք: Կհանդիպենք կես ժամից:

Դեյվը բռնեց բանկոնիցս ու քաշեց ետ: Արագընթաց ավտոմեքենաների հռնդոցը և բեռնատարների դղրդոցը փողոցում այնպիսի աղմուկ էին բարձրացրել, որ միմյանց լսելու համար ստիպված էինք գոռալ:

Ճիշտ այն պահին, երբ կրկին փորձում էի նրան համոզել, որ գնա ճաշելու, շրջվեցի և տեսա սև սեղանը, որն անկյունից ուղիղ մեր կողմն էր գալիս: Գալիս էր արագ, ժամում քառասուն մղոնից ավելի արագությամբ՝ անկյունը հատելով մայթին շատ մոտ:

Որովհետև Դեյվը մեջքով էր կանգնած և չէր կարող տեսնել մեքենան, քաշեցի նրան, որպեսզի ճանապարհից դուրս բերեմ:

Հավանաբար, նա մտածեց, թե ես փորձում եմ իրեն մենակ ռեստորան ուղարկել, որովհետև մի կողմ քաշվելով՝ մի քայլաչափ հեռացավ ինձնից: Հետո արդեն շատ էր ուշ նրան ճանկելու և ճանապարհից հեռացնելու համար և մնում էր միայն բարձրաձայն գոռալ փողոցի աղմուկում: Դեյվը, ամենայն հավանականությամբ, դեռ մտածում էր, թե փորձում եմ իրեն մենակ ռեստորան ուղարկել, և կրկին ընկրկեց: Երբ երկրորդ անգամ ետ-ետ գնաց, սեղանի բամպերը և աջ թևը հարվածեցին նրան: Տապալված խաղափայտի նման նա զարկվեց մայթին:

Վիթխարի սեղանը առնվազն երեք քայլ անցել էր անկյունից, անիվները բարձրացել էին մայթին:

Դեյվի դեմքին տարօրինակ արտահայտություն կար:

Վարորդն անջատեց շարժիչը, մոտեցավ մեզ: Շատ չանցած բոլոր կողմերից սկսեցին մարդիկ հավաքվել և շրջապատեցին մեզ:

— Դու վիրավոր ես, Դեյվ,— հարցրեցի նրան՝ ծնկելով մայթին:

Վարորդն անցավ ամբոխի միջով, և երբ ես շրջվեցի, նա կանգնած էր Դեյվի ոտքերի մոտ ու խոժոռված մեզ էր նայում:

— Մա՛յք,— ասաց Դեյվը՝ դեմքը շրջելով դեպի ինձ,— Մա՛յք, կեսդոլարանոցը շավարիս աջ գրպանում է:

Նրա մատներն այնպես ամուր էին սեղմում ձեռքս, ասես, նա վախենում էր ընկնել:

— Մոռացիր կեսդոլարանոցը, Դեյվ,— խնդրեցի նրան:— Եթե վիրավոր ես, ասա: Եթե վիրավոր ես, անմիջապես բժիշկ կկանչեմ:

Դեյվը բացեց աչքերը և նայեց ինձ: Նրա ուսերը թույլ ցնցվեցին, և նա ավելի ամուր բռնեց ինձ:

— Նրան ոչինչ էլ չի եղել,— ասաց սեղանի վարորդը՝ արմունկներով հրելով մարդկանց:— Նրան ոչինչ էլ չի եղել: Նա ձևացնում է:

Նա կանգնել էր մեր գլխավերևում և նայում էր Դեյվին: Բերանը կիսաբաց էր, իսկ շուրթերը կտր էին և ուռած էին թվում: Երբ խոսում էր, շուրթերը չէին շարժվում, ասես, բերանի անարյուն հավելվածներ էին՝ դեպի դուրս ոլորված:

— Մա՛յք,— ասաց Դեյվը,— երևի թե պետք է հրաժարվեմ նախկին աշխատանքիս վերադառնալու փորձերից: Հիմա արդեն շատ ուշ է: Ես այլևս դրա համար ժամանակ չեմ ունենալու:

Մեր գլխավերևում կանգնած վարորդը խոսում էր ամբողջից մի քանիսի հետ: Թվում էր, նրա շուրթերը չափից ավելի պիրկ են շարժվելու համար. հիմա նրանք նման էին հում խմորի գնդիկների:

— Նա ձևացնում է,— նորից ասաց նա:— Կարծում է, թե կարող է մի քիչ փող պոկել, բայց ինձ ծանոթ են այս թափառաշրջիկների խորամանկությունները: Նրան ոչինչ էլ չի եղել: Ինչքան ես եմ վիրավոր, այնքան էլ՝ նա:

Ես լսում էի մեր շուրջը հավաքված մարդկանց խոսակցությունը: Նրանց մեջ մի երիտասարդ կար, որը բավականին բարձր էր խոսում, որպեսզի բոլորը լսեին: Ես չէի կարող տեսնել նրա դեմքը, բայց չկար մեկը, որին չհասներին նրա բառերը:

— Ճիշտ է, նա թափառաշրջիկ է: Դրա համար էլ նրան հիվանդանոց չեն տանում: Ո՛ւմ ցավն է կտրվել, որ հոգ տանի թափառաշրջիկի մասին: Նրան հենց այնպես՝ անվճար, հիվանդանոց չեն հասցնի: Հանկարծ կարյունոտվի սեղանը: Չեն ուզում, որ թափառաշրջիկն իր արյամբ կեղտոտի պերճաշուք պաստառը:

Ես արձակեցի Դեյվի բաճկոնը և վերնաշապկի տակից փորձեցի ստուգել՝ արդյոք ուսի ոսկորներից որևէ մեկը չի կոտրվել: Դեյվը նորից փակել էր աչքերը, բայց մատները դեռևս ամուր սեղմում էին դաստակս:

— Նա ձևացնում է,— ասաց վարորդը:— Այս թափառաշրջիկներն ամեն խորամանկություն կբանեցնեն փող պոկելու համար: Նրան ոչինչ էլ չի եղել: Նա վիրավոր չէ: Ձևացնում է:

Մեր թիկունքում կանգնած երիտասարդը նորից խոսում էր:

— Ինչո՞ւ նրան քո սեղանով հիվանդանոց չես տանում, հաստամոռ՛ւթ:

Վարորդը նայեց ամբողջին, բայց ոչինչ չասաց:

Ես ձեռքս հանեցի Դեյվի վերնաշապկի տակից և մատներիս արյուն տեսա: Ուսից չէր գալիս, այլ կրծքավանդակի ձախ կողմից, որը բախվել էր գետնին, երբ մեքենան վայր էր գցել նրան: Ես ձեռքս կրկին մտցրի՝ կոտրվածքը շոշափելու: Դեյվի մարմինն այդ մասում փափուկ էր ու թաց, և ես նրա սրտի բարբախյունը զգացի այնպես, ինչպես կզգայի, եթե այն ափիս մեջ լիներ:

— Ինչպե՞ս տեղափոխենք հիվանդանոց,— ասացի վարորդին, որը մեզ էր նայում:— Նա վիրավոր է:

— Թափառաշրջիկների սիրած խաղերից է,— ասաց վարորդը՝ հերթով նայելով հավաքվածներին:— Նրան ոչինչ չի եղել: Նա վիրավոր չէ: Եթե վիրավոր լիներ, կգոռար: Դուք չեք լսել նրա գոռոցն ու տնքոցը, չէ՞: Նա պառկել է այստեղ միմիայն ինձանից տասը-քսան դույար ստանալու համար: Եթե փող տայի, վեր կթռչեր և ամբողջ թաղամասը ոտքի կհաներ նախքան իմ հեռանալը: Լավ եմ ճանաչում այս թափառաշրջիկներին, բոլորը փող են ուզում: Եվ սա էլ ոչնչով չի տարբերվում նրանցից, ձևացնում է: Ինչքան ես եմ վիրավոր, այնքան էլ նա:

Փորձեցի վեր կենալ և բարձրացնել Դեյվին: Կարող էինք նրան հիվանդանոց հասցնել, եթե նույնիսկ վարորդը սեղանով չտաներ:

Վարորդը կրկին շրջվել էր դեպի ամբոխը և փորձում էր մարդկանց համոզել, թե Դեյվը փողի համար փորձում է իրեն ուշացնել:

— Նա ձևացնում է,— ասաց նա՝ իր մեռած շուրթերի արանքից ճչալով:— Այս թափառաշրջիկները կարծում են, թե մեքենայի դեմ թռչելով և ապա վիրավորի պես ոռնալով կարող են փող աշխատել: Սա լավ դաս է նրանց համար. հիմա արդեն վերջ կտան: Ճանաչում եմ դրանց, գիտեմ, թե երբ են ձևացնում:

Դեյվը բացեց աչքերը և նայեց ինձ:

— Մի բուպե սպասիր, Մա՛յք,— ասաց նա:— Ցած դիր ինձ: Ուզում եմ քեզ բան ասել:

Զգուշորեն պառկեցրի մայթին: Նայում էր ինձ, իսկ ձեռքը սեղմում էր դաստակս:

— Ես միայն ուզում եմ համոզված լինել, որ դու գիտես, թե որտեղ է կես դույարը: Շավարիս աջ գրպանում է այն:

Ես պատրաստվում էի նորից նրան ասել, որ ամեն ինչ կարգին է, որ մոռանա դա, երբ հանկարծ դաստակս սեղմող նրա մատները թուլացան, և աչքերը մթնեցին: Ամբողջ այն ժամանակ, երբ նրան գրկած ծնկի էի եկել, փորձում էի որևէ բան մտածել Դեյվին ասելու, քանի դեռ ուշ չէր:

Մինչ ես կարող էի որևէ բան մտածել նրան ասելու, սեղանի վարորդը, արմունկներով հրելով հավաքվածներին, կանգնեց մեր գլխավերևում:

— Նա ձևացնում է,— ասաց նա:— Կեղտոտ թափառաշրջիկը ձևացնում է:

Արմունկներով ճանապարհ բացելով ամբոխի միջով՝ նա գնաց դեպի մեքենան: Երբ մոտեցավ մեքենային, ամբողջ ձայնով գոռաց.

— Նրան ոչինչ էլ չի եղել: Ոչինչ չի կարող բարդել ինձ վրա: Լավ եմ ճանաչում այդ կեղտոտ թափառաշրջիկներին: Նրանք բոլորն էլ փող են ուզում, իսկ հետո իսկույն առողջանում են: Կեղտոտ թափառաշրջիկը ձևացնում է:

— Իհարկե, նա թափառաշրջիկ է,— ասաց երիտասարդը. նրա ձայնը հնչեց զանգի դողանջի մաքրությամբ:— Հանկարծ կարյուճոտվի մեքենայիդ պերճաշուք պաստառը:

Հենց այդ ժամանակ վազելով մի ոստիկան եկավ, որի ուշադրությունը գրավել էին խմբված մարդիկ: Ճեղքելով ամբոխը՝ մոտեցավ ինձ և իր գիշերային մահակով խթելով, հարցրեց, թե ինչ է պատահել: Նախքան ես կրացատրեի, նա մահակով հարվածեց մեջքիս:

— Խրտվիլակներ, ո՞ր սատանան է ձեզ թույլ տվել փակել փողոցը:

Ես նրան ասացի, որ Դեյվը մեռած է:

Նա կռացավ և նոր միայն տեսավ Դեյվին:

— Դա ուրիշ բան,— ասաց նա:

Ոստիկանը շրջվեց, գնաց փողոցի անկյունը և հեռախոսախցից սանիտարական ավտոմեքենայի համար քաղաքային հիվանդանոց գանգահարեց: Երբ վերադարձավ, սեղանի վարորդը գնացել էր:

— Ինչո՞ւ նրան հիվանդանոց չտարաք այն մեքենայով, որը հարվածել էր,— հարցրեց ոստիկանը՝ պտտեցնելով մահակը և նայելով քիչ այն կողմ՝ ցուցափեղկի դիմաց կանգնած կնոջը:

— Մի՞թե պարզ չէ, նա թափառաշրջիկ է,— ասաց նույն երիտասարդը:— Չուզեցինք թափառաշրջիկի արյամբ կեղտոտել պերճաշուք պաստառը:

Ոստիկանը կանգ առավ, նայեց երիտասարդին ու ինձ:

— Ձե՛զ նման, թափառաշրջիկներ,— ասաց նա՝ մահակով խթելով մեզ:— Օդը մաքրեք, քանի դեռ երկուսիդ էլ չեմ ձերբակալել:

Ես վազեցի Դեյվի մոտ և կանգնեցի նրա գլխավերևում՝ մի քայլ հեռու: Մահակը ճոճելով և հայիոյելով՝ ոստիկանը հարձակվեց ինձ վրա:

Հանկարծ փողոցի բոլոր լույսերը միանգամից խավարեցին, և երբ նորից աչքերս բացեցի, երիտասարդը, որ կանգնած էր եղել կողքիս, ինձ քարշ էր տալիս փողոցն ի վար՝ դեպի պահեստները: Վերջին լապտերի տակով անցնելիս՝ երախտագիտությամբ նայեցի նրա դեմքին: Մենք ոչ մի բառ չփոխանակեցինք: